

- 1^r Des narren bry / ich nye vergaß
- 2^r Do mir gefiel das spiegel glaß
- 3^r Hans esels or / min brüder was

Kap. 60



von im selbs wolgefallen

- 1 Der rürt jm wol den narren bry
- 2 Wer wānet das er witzig sy
- 3 Vnd gfelt alleyn im selber wol
- 4 Jnn spiegel sicht er yemertol

5 Vnd kan doch nit gemercken das
 6 Das er eyn narren sicht jm glaß
 7 Doch wann er schweren solt eyn eyt
 8 Vnd man von wiß vnd hüpschen seyt
 9 So meynt er doch er wers alleyn
 10 Man fynd sins glich vff erden keyn
 11 Vnd schwûr ouch / jm gebröst gantz nüt
 12 Syn dûn vnd lon / gefelt jm all zyt
 13 Den spiegel er nit von jm latt
 14 Er sytz / lyg / ritt / gang / wo er stat /
 15 Glich als der keyser Otto dett
 16 Der jn dem stritt eyn spiegel hett
 17 Vnd schar all tag syn backen zwilch
 18 Vnd wûsch sie dann mit esels milch
 19 Das ist eyn wibertâding gût
 20 Keyn on den spiegel ettwas dût
 21 Ee sie sich schleygeren recht dar vor
 22 Vnd mutzen / gat wol vß eyn jor
 23 Wem so gefelt wiß / gstat / vnd werck
 24 Das ist der aff von Heydelberck
 25 Pygmalion gfiel syn eygen bild
 26 Des wart er jnn narrheyt gantz wild
 27 Hett sich Narcissus gspieglet nit
 28 Er hett gelebt noch lange zyt
 29 Manches sicht stâts den spiegel an
 30 Sieht doch nit hüpsches dar jnn stan
 31 Wer also ist eyn narrecht schoff
 32 Der lidt ouch nit das man jn stroff
 33 Jo gatt er jnn sym wesen hyn
 34 Vnd will mit gwalt / nit witzig syn

*k3r**k ij*